



Jumat, 04 Juni 2021

Ogen: 1 Petrus 3:4-5



MEHAMAT MAN PERBULANGEN



Perjabun mpersadakeen dua kalak, dilaki ras diberu, i bas kegeluhen si badia. Dibata njadikan dilaki ras diberu, erjabu, guna nerusken kegeluhen doni enda, reh teremna. Ertina i bas jabu ikuhi Dibata anak guna nerusken kegeluhen doni enda, bagi pedahna reh teremna dengen demi doni enda.

Si menarik i bas kegeluhen perjabun eme ralasi dilaki selaku perbulangen ras diberu selaku ndehara. I bas tradisi Jahudi, diberu e sikerajangen dilaki, nggeluh ngelai dilaki, mereken sinursur man bana. Emaka la sitik budaya enda ndalanken 'poligami' nterem ndeharana. SITuhuna la saja Jahudi tapi budaya-budaya doni enda termasuk kalak Karo pe nai, lit nge erpoligami, erbage-bage penyebabna, umpamana kerna anak, gelah la masap seh lit anak dilaki tetap iusahaken, amin pe erjabu ka mulihi.

I bas renungenta paksa enda nuriken kai si suratken Petrus, hubungan perbulangen ras ndehara, kuga arusna perukuren ras perbahanen ndehara man perbulangenna. Iturikenna kepatuhen ndehara man perbulangen alu biak ras lagu langkah. Ndehara arus ngelai, ngekelengi perbulangen alu biak i bas pusuh nari. La pekulah-kula, pusuh si mejile, lemah lembut dengen ukur siteneng. Ertina kinijilen simeherga eme singena ate Dibata.

Alu bage nuriken man banta kerina Moria, selaku tinepa Dibata arus min kita tetap njagai dirinta, perukuren, mpejile pusuh peratenta. La terjeng penampilen luarta si 'poles habis'. Perlu kusalon ula lupa nalon pusuh ras ukurta alu kata Dibata. Perlu erbaju mbaru ula lupa 'baju kinitekenta', kerina penampilenta e ngena ate DIbata ras manusia. Termasuk hubungan ras perbulangen. Mehamat man perbulangen tandana kita mehamat man kerina jelma termasuk man Dibata.